

Morning Dogri (NSD) National News Bulletin 27-09-2024

आकाशवाणी

- केन्द्री मंत्री प्रहलाद जोशी होरें आखेआ ऐ जे भारत पूरी दुनिया च एथेनाल दा त्रीया सब्बने शा बड्डा निर्यातक ते उपभोक्ता मुख्य बनी गेआ ऐ।
- एनआईए नै असम च केई थाहरें पर विस्फोटक रखने कन्नै सरबंधत मामले च उल्फा-आई दे मुख अरोपी गौतम बरूआ गी गिरफ्तार करी लैता ऐ।
- केन्द्र सरकारै उजरत दिएं घट्टोघट्ट दरें च बाद्धा करी दित्ता ऐ। एह हुक्म पैहली अक्टूबर थमां लागू होई जाग।
- अज्ज मुख्य भरै च सैलसफा सरबंधी कुल संसारी ध्याड़ा मनाया जा'रदा ऐ।
- मकारु ओपन बैडमिंटन च किदाम्बी-श्रीकांत, ट्रीसा जॉली ते गायत्री गोपीचंद भारत दी तरफा चुनौती पेश करगंन।

<><><><><><>

Joshi

खाद्य ते सार्वजनिक बंड-बिक्री मंत्री प्रलहाद जोशी होरें गलाया ऐ जे भारत इथेनाल दा दुनिया दा त्रीया सब्बने शा बड्डा उत्पादक ते उपभोक्ता बनी गेआ ऐ। नमीं दिल्ली च कल दऊं रोजा भारतीय खंड ते जैव ऊर्जा सम्मेलन दा उद्घाटन करदे होई उनें इस गल्ला पर जोर दित्ता जे सरकार खंड दे इक मजबूत ते टिकाऊ उद्योग लेई प्रतिबद्ध ऐ जेहड़ा ना छड़ा इक आर्थिक स्तंभ ऐ, सगुआं भारत दे अक्षय ऊर्जा क्षेत्र च इक प्रेरक शक्ति बी ऐ। जोशी होरें देश च खंड दे उत्पादन बारे गलाया जे पिछले दहाके च गन्ने दी खेती च करीब 18 फीसदी दा बाद्धा होआ, जदके गन्ना उत्पादन 40 फीसदी बधेआ। उनें गलाया जे घट्टोघट्ट समर्थन मूल दे राएं करसानें गी बकाया राशि दा भुगतान हुन अतीत दी गल्ल ऐ। केन्द्री मंत्री होर देश दे अक्षय ऊर्जा क्षेत्र च करसानें दे अन्नदाता शा ऊर्जादाता बनने तगर दी महत्वपूर्ण भूमका दा बी जिक्र कीता।

उनें गलाया जे सरकार नै ग्रीन हाईड्रोजन दे उत्पादन, उपयोग ते निर्यात दे उद्देश्य कन्नै भारत गी वैश्विक केन्द्र बनाने लेई पिछले बरे 19 जहार 744 करोड़ रपे दी लागत कन्नै राष्ट्रीय हरित हाईड्रोजन मिशन शुरू कीता हा।



Maharashtra

महाराष्ट्र दे उप-मुख्यमंत्री ते ऊर्जा मंत्री देवेन्द्र फदनविस होरें गलाया ऐ जे सरकार दी योजनाएं दा एह उद्देश्य ऐ जे 2070 तगर कार्बन दा बिल्कुल उत्सर्जन नेई करने दे लक्ष्य गी हासल कीता जाई सकै। राज्य नै 2030 तगर 50 फीसद अक्षय ऊर्जा उत्पादन दी दिशा च महत्वपूर्ण गैह पुट्टने न, जेहदे तैहत 47 जहार 500 करोड़ रपे दे समझौता-ज्ञापन शा 18 जहार 828 रोजगार दे मौके पैदा होने दी मेद ऐ।



NIA Arrest

राष्ट्री जांच अर्जेसी एनआईए नै असम च केई थाहरें पर विस्फोटक रखने कन्नै सरबंध मामले च यूनाइटेड लिब्रेशन फ्रंट ऑफ असम-उल्फा-आई दे मुख अरोपी गी गिरफ्तार कीता ऐ। एनआईए नै इक ब्यान च आखेआ ऐ जे अरोपी गौतम बरूओ गी बंगलुरु दे बाहरले इलाके थमां फगड़ेआ गोआ जित्थे ओह छप्पे दा हा। अर्जेसी नै दस्सेआ जे अरोपी उल्फा-आई दिएं गतिविधिएं च शामिल हा। जिन्ने बंदश आले गुट दे हुक्म पर असम दे उत्तरी लखीसपुर जिले च विस्फोटक रखे हे। गिरफ्तारी दे बाद उसी बंगलुरु च विरोध एनआईए अदालतै च पेश कीता गोआ। अदालतें उसी न्यायिक हीरासत च रखने ते असम एनआईए दी विशेष अदालत अगगे पेश करने दा हुक्म दित्ता।



Global Innovation

आलमी सतह पर नमिएं काहडें सरबंधी सूचकांक च भारत दुनिया दिएं 133 अर्थबवस्थाएं च 39मीं थाहरै पर आई पुज्जा ऐ।

Monkey Pox

स्वास्थ्य ते परिवार कल्याण मंत्रालय नै राज्य ते केन्द्र शासत प्रदेशों गी गलाया ऐ जे ओह मंकी पाक्स बमारी दे सरबंधै च लोकें गी जागरूक करने लेई लोडचदी कारवाई करन। मंत्रालय नै राज्यें गी रणनीतिक निगरानी बनाई रखने दा अनुरोध कीता ऐ। राज्यें गी मंकी पाक्स दी जांच लेई संचालित प्रयोगशालाएं दी सूचि दित्ती गई ऐ। मंत्रालय नै राज्यें गी स्वास्थ्य सुविधाएं दी तैआरिएं दा जिला ते राज्य स्तर उप्पर वरिष्ठ अधिकारिएं आस्सेआ नेडमी तक्क रखने दे निर्देश बी जारी कीते। मंत्रालय नै संदिग्ध ते पुष्ट मामले लेई अस्पतालें च बक्खरी बवस्था करने लेई गलाया ऐ।



World Tourism

अज्ज विश्व सैलसफा दिवस मनाया जा'रदा ऐ। अज्ज इस उपलक्ष्य च सैलसफा मंत्रालय नमीं दिल्ली च "पर्यटन ते शांति" विषे उप्पर सैलसफा सरबन्धी कुल संसारी ध्याड़ा मनाग। एहूदे तैहत सैलसफा क्षेत्र दा देश दे विकास च ते शांति बनाई रखने च ओहूदे योगदान गी उजागर कीता जाग। उपराष्ट्रपति जगदीप धनखड़ होर अज्ज इस समारोह गी संबोधत करगंन। इस मौके पर मंत्रालय देश दे सैलसफा दे स्हाबै सब्बने शा बेहतरिन ग्राएं दे नाएं दा ऐलान बी करोग। जिनेंगी एहूदे लेई पुरस्कार दित्ते जांगन।



PM

प्रधानमंत्री नरेन्द्र मोदी होरें कल संजा पुणे च वीडियो कांफ्रेंसिंग राएं 3 परम रुद्र सुपर कम्प्यूटर राष्ट्र दे नमित कीते। तकरीबन 130 करोड़ रपे दी लागत आले एह सुपर कम्प्यूटिंग मिशन तैहत स्वदेशी तौरा पर विकसित गेदे न। वैज्ञानिक अनुसंधान गी होर सखल्ला बनाने लेई इनें कम्प्यूटरें गी पुणे, दिल्ली ते कोलकाता च स्थापत कीता गेआ ऐ। इस मौके पर बोलदे होई प्रधानमंत्री होरें गलाया जे एह विज्ञान ते प्रौद्योगिकी दी दुनिया च भारत लेई इक बड्डी उपलब्धि दा दिन ऐ। एह बी दर्शा'दा ऐ जे 21मीं सदी दा भारत विज्ञान, प्रौद्योगिकी ते अनुसंधान गी प्राथमिकता देइयै कियां अगगे बधा'रदा ऐ। उनें गलाया जे नेहा कोई क्षेत्र नेई जेहड़ा सिद्धा प्रौद्योगिकी ते कम्प्यूटिंग क्षमताएं उप्पर निर्भर नेई ऐ।

प्रधानमंत्री होरें गलाया जे एह उपलब्धि एह साबत करदी ऐ जे साढा मुख्य सेई दिशा च सेई गति च अगगे बधा'रदा ऐ। एह सेक्टर उद्योग दे क्षेत्र च भारत दी सफलता दा सब्बने शा बड्डा आधार ऐ। मोदी होरें गलाया जे सैमीकंडक्टर विकास लेई बडा जरूरी ऐ ते केन्द्र ने इक महत्वपूर्ण पैहल करदे होई इंडिया सैमीकंडक्टर मिशन शुरू कीता ऐ।

<><><><><><>

France

फ्रांस दे राष्ट्रपति इमैनुअल मैक्रा होरें भारत गी विस्तारित संयुक्त राष्ट्र सुरक्षा परिषद दे स्थाई सदस्य दे रूपै च शामिल करने दा जोरदार समर्थन कीता ऐ। मैक्रा होरें न्यूयार्क च संयुक्त राष्ट्र महासभा दे सत्र च एह गल्ल आक्खी। फ्रांस दे राष्ट्रपति होरें गलाया जे भारत, जर्मनी, जापान ते ब्राजील गी स्थाई सदस्य होना लोडचदा ते अफ्रीका अपना प्रधिनिधित्व करने लेई बी दो मुल्खें गी नामित करै। एहदे शा पैहले अमरीका दे राष्ट्रपति जो बाइडेन, रूस दे विदेश मंत्री, सर्गेई-लावरोव ते चिली दे राष्ट्रपति ग्रेबियल बोरिक फॉए हुंदे सनें होर दुए लीडरें बी भारत दी स्थाई सदस्यता दी वकालत कीती।

<><><><><><>

Badminton

मकारु ओपन बैडमिंटन प्रतियोगिता दे महिला डबल्स दे क्वार्टर फाइनल च गायत्री गोपीचंद ते ट्रीसा जॉली दा सामना ताइवान दी हसु यिनहुईते बुलुओ यू दी जोड़ी कन्नै होग। एह मैच भारतीय समें मताबक बडलै 10 बज्जियै 50 मिंटे उप्पर खेड्डेआ जाग। भारतीय जोड़ी नै प्री क्वार्टर फाइनल च ताइवान दी लिन चिह चुन ते तेंग चुन हसुन गी हराई दित्ता हा। तोआई मर्दे दे सिंगल्स क्वार्टर फाइनल च अज्ज किदांबी श्रीकांत दा मकाबला हांगकांग दे अंगुस एनजी का लॉग कन्नै होग। एह मैच बडलै साढे 10 बजे खेड्डेआ जाग।

<><><><><><>